

張文襄公全集

劉春霖題



張文襄公全集卷一百四十二

電牘二十一

致江陰張舒兩統領

光緒二十一年正月初一日
戌刻發

詳詢情形黃山東峯之第一峯頂應安二百五十磅大礮第二峯頂第三峯頂均應安快礮此兩峯卽錢道圖所謂中峯也黃山西峯頂應安八百磅大礮一尊小角山峯頂應安八百磅大礮一尊因大礮煙多故安置內免致煙蔽後臺之目二百五十磅礮較靈速故安置最前快礮係無煙藥故亦令在前大礮力遠雖設在後與前數礮所到之地仍相同耳現在已安將竣之快礮兩

尊並列一處相距止兩三丈實不合法可將未安妥之一尊移置第二峯或第三峯頂酌之仍留一峯俟上海續成快礮當補安也惟西峯安大礮處務宜與現安快礮之地上下參差錯開不可一綫凡礮臺萬不可多礮聚於一處尤不可上下一綫如一處一綫則敵礮易中或高或下總有受傷處耳可趕速將此兩礮起在岸上今租成之水馬頭回滬速運第二礮成約若干日可起上岸再洋弁山頂開路以便行機器小快礮一節甚有理以及開河各節均速辦務照成議二十日辦竣爲佳若速辦成兵勇仍當酌賞礮位圖已批明遣人交馬加

利明日送到卽分晰復元旦

致上海經道

光緒二十一年正月初一日亥刻發

頃龔欽差來電云倭已派輪赴南洋劫軍火船等語速告李德能否今夜卽開赴鎮江爲要已電滬鎮兩關速放行勿阻矣卽復元旦

致天津劉欽差

光緒二十一年正月初二日午刻發

第一批軍械十二月初自鎮江北運聞全未到津遲延可怪令人焦急總由車少之故惟江南轉運局皆附於北洋轉運局此吳道之意爲省費耳然車少械多則不免有先後積壓矣鄙意欲江南自行設局爲便惟車皆

自北方雇來此間未能深悉情形請公就近查詢飭該局籌議如何方能迅速車若干方能敷用宜養長車若干輛騾若干頭或自北方雇夫或在豫東雇或自行購買畜養總以隨到隨運不致耽延候車爲主卽或遇械多之時候本局車往返亦只可候一次總之兩次必須運完中途必宜多設數局兩局相距不過二百里內外則車輛周轉較速此時須預發銀若干惟期軍械迅速多費亦所不惜以後軍械尙多事機日急若似此延緩軍械到而事已誤矣必急思變計爲要公若籌有辦法弟當竭力辦之祈速示復沃

致蘇州奎撫台

光緒二十一年正月初二日申刻發

張國林北上後川沙一路已令奇兵營往紮白龍港助礮隊防守彼處尙有礮隊三哨設有百磅子快礮二尊擊水中防登岸之賊在礮好不在勇多已飭勤加操練川沙廳外之白龍港水淺泥深潮退則乾涸無水須潮漲時舢板行十餘里方能到岸至川沙廳以內至製造局陸路七十里路窄港多不能行大隊倭寇似不能由此道來且防白龍港卽須扼港口之海塘川沙相隔亦不近要緊似在金山衛水深輪近設由彼處入可擾蘇松甚近甚可慮故令朱洪章十營全紮此處惟後路尙

單王道立鰲來金陵弟與面商擬令所部新舊三營紮朱鎮後路至應紮何處相距應若干里令與朱鎮商辦蓋權其緩急若金山一路布置已周密其次再顧川沙耳茲劉道電稱台端令王道新勇一營護局一營防川沙具仰慎固局防之至意自應一聽尊裁惟王道三營一已在金山一在川沙一在滬局相去遠者二百數十里近者七十里該道調度督率似不甚便兵愈分則力愈單亦難禦敵查滬局現有蕭鎮江兩營已可資防護蓋禦敵在遠不在近在扼要不在分布近局旁之勇只爲彈壓土匪而已尊意如謂王道營以護局爲重或卽

令暫紮白龍港應請公熟籌如以何處爲最要卽飭該
道三營全紮何處較爲得力或白龍港或金山衛或金
山嘴奉賢一帶均可同是扼一道海塘路寬且平將來
移動援應尙便既有所見未敢緘默應如何辦理統俟
卓裁或令王道自籌擬一辦法請公核定何如沃

致上海上海道劉道台

光緒二十一年正月初三日
子刻發

怡和花機務須禁其進口以杜外人奪利之漸望先飭
稅司查明怡和已到紗機若干錠布機若干張電復以
便酌辦冬

盛道來電

光緒二十一年正月初一日辰刻到

紗布大利歲漏數千萬賴憲台首創其難宣因之招
成六廠歲可收利千萬英人忌甚今春怡和請放花
機進口宣與聶道阻止并集衆華商稟請南北洋永
遠堅拒奏咨在案昨劉道電述稅司所云怡和花機
一經暫准深恐各國效尤難與力爭所見極遠洋人
獲息數釐卽樂爲如不拒止華商必被傾軋虧折鄂
新廠欠款難以利還終恐歸與洋人關繫甚巨北洋
因軍務憂憤神志已懈昨復劉道作爲滬關之意暫
予通融其實一通融則全局俱敗倭事了後籌餉更
難豈可將商務從此廢弛擬請憲台仍執去年十二

月十八總署照會各國洋商販運機器有礙華民生計之物爲稅則所不載者不准進口迅飭滬關堅持阻止宣當一面稟懇總署堅持或謂國有軍務不可得罪洋商何太怯也各國商務皆歸自主拒之英不能翻面迎之反爲各國所笑然能否挽回全在憲台一人宣懷稟

致江陰統帶廣保軍林副將保

光緒二十一年正月
初三日子刻發

知該軍已到江陰爲慰務須嚴飭營哨官加意約束萬不可令滋事致壞粵軍聲名要緊要緊現紮地方是否城內抑係城外卽明晰電復江陰南岸礮臺左近有空

營盤該副將速往一看將各營移紮不宜久紮城內切

切初二

致煙臺李撫台謝委員

光緒二十一年正月初三日寅刻發

聞倭另股自甯海登岸將合攻威海確否聞除夕我軍大勝倭於楊頭集想已確速示沃

李撫台來電

光緒二十一年正月初四日子刻到

廿九小勝除夕初二復小挫現速扼堵於威海東二三十里兵固單尤苦無將前敵敢戰之將僅一孫萬林威西之甯海無倭登岸前日登州倭輪又相持一日而退煙臺英領事寄劉道云日本兵船來口彼此

不得開礮等語真堪怪異頃分別電奏摺陳來定開礮鐵艦不出海軍虛設衡身居虎狼面大海不以自危盡此身心而已衡江

致煙臺李撫台威海戴統領

光緒二十一年正月初四日酉刻發

昨今兩日有戰事否念甚彼人衆而械精似可獎勵民團於林木巖谷多設疑兵晝夜擾之藉以耗彼彈藥前敵苦戰似可在煙臺多備乾糧運往接濟前敵以省該營糧運之煩當否請酌支

李撫台來電

光緒二十一年正月初七日亥刻到

威海南幫礮臺已失敝部與戴道尙死守北臺儻能

保全萬分之幸否則能守住煙臺援兵一到亦較易
措手惟槍械萬分缺乏懇求賜撥如蒙俯允乞派員
兼程由江蘇贛榆山東日照膠州一路徑解煙臺最
爲徑捷不勝待命祈先電復舊屬秉衡謹肅陽

致天津盛道台

光緒二十一年正月初六日亥刻發

支電悉徐州練兵以備入衛誠爲要策惟餉旣難籌將
亦不易卽有洋將洋弁仍須華將爲正統領方妥來電
謂閣下能設法籌款能籌若干大略從何處設法尊意
中有何將可任用漢納根現在情形若何想已不用能
調來江南否均祈迅速詳示方能酌辦至託許星使募

洋弁一節是否閣下託抑或出自傳相託或胡芸楣託望明示語

盛道來電

光緒二十一年正月初五日午刻到

十月朔條陳總署代奏募客將照西法練精兵三萬人上意許可派胡臬司與漢納根議辦漢欲獨攬餉權胡請停罷今和議難成上意頗悔詳探倭兵皆西法槍盡有準韜略尤精我軍亂打雖有小勝終必潰敗如欲制勝仍須募練宣可設法籌款即在徐州開練六月可接仗已請竹簣募德將弁八員元宵起程到滬俟定計再添募如京師急可入衛圖恢復

此遠著也支

又光緒二十一年正月初八日未刻到

許募洋將係宣託辦傳相允行德以戰兵萬二千爲
一軍加礮隊馬隊工隊四千月餉約廿餘萬擬先借
洋債隨後籌捐歸補前兩年宣辦山東海防捐收三
百萬賑捐百餘萬似不難此外籌款必須面商至統
將須兼智勇黃軍門少春張軍門春發可用否漢納
根頗驕縱深怨胡而德將勝於漢者尙有人如欲調
須先抑之憲意決否乞速示陽

致總署

光緒二十一年正月初七日午刻發

怡和洋行購到紡紗機二萬錠約值銀五千兩當以有
違鈞署定章飭滬關禁阻進口茲據上海甯波紡織廠
紳商公電稟稱此項機器有礙華民生計洋商改造土
貨顯背約章稟請嚴禁查條約只准洋商來華通商貿
易并未准其購機來華製造華商購機設廠尙且須先
行稟准方能開辦洋商豈能擅便近年中國製造風氣
漸開從此漸塞漏卮實爲自強第一要著今該行購機
若不嚴禁於始以後各國紛紛開廠製造改造土貨將
至利權盡失無可補救總之洋商爲中國官商販運機
器則可若自行購辦設廠則萬不可行此次怡和所購

紗機只二萬錠僅值銀五千兩顯係自知理屈不敢多辦多辦恐不放行致多虧折故小試其端耳至此項機器如禁阻後該紡織紳商願出價購之或謂海防有事之時無妨稍與通融不知此乃商務所關條約分明與兵事絕不相涉萬萬無慮務懇鈞署鼎力堅持儻英使來瀆務求嚴行駁斥并飭總稅司轉飭滬稅司嚴行禁阻以收利權而杜覬覦至盼至禱陽

致武昌譚護制台

光緒二十一年正月初七日亥刻發

銀元局事於初四會銜電奏本日接總署初六日來電奉旨張之洞電奏與譚繼洵商明將湖北銀元局歸